

兩
浙
名
賢
錄

兩浙名賢錄卷之三十一目次

武功

宋

殿前都虞候張伯玉瓊

鎮海軍司馬孫承祐

子誘附

兩浙都鈐轄沈承禮

知龍泉沈濟叔希稷

台州鎮將杜伯僖

子幼常幼偉孫士賢附

鄧熹

趙育才

薛彥明開

兄問閔從子居實從兄謹言里人鮑若雨包汝諸附

黃仁環

唐子客附

王達

陳彥聲宗譽

承信郎閻丘民表觀

殿前將軍章淑

承信郎方彥通庚

子五人附

統軍王子武

錢學山附弟胥

鞏州通判詹至

任彥遠李倫董之邵附

趙權

神勇軍統制呂希祖渭孫

檢校少師孟璞玉珙

元

吐蕃宣慰使陳洋

知吉州軍事楊國華實

東坡目次

卷之三十一

二

光緒堂

東陽尉王靖翁安國

武略將軍董彥光

弟沈傳
二子附

明

周德問

袁千戶興

昭信校尉王仕龍威

弟永
和附

田子貞貞

永康翼左副元帥呂用明文燧

弟玄明佐
李文附

浦江翼左元帥吳志德

蔣可
大附

吳啟明文秀

義兵千戶葉良器

良殷景陽
孟圭附

駕前親軍指揮周得璇

吳伯榮壽孫

子仁
附

陽朔縣知縣蔣公直

指揮同知蔣貴

燕山左護衛指揮僉事陳良輔翼

父典
附

仁和衛千戶王時泰業

懷遠將軍崔惟正端

劉原熊

山西道監察御史項思誠

禮部曾孫守

王剛甫

指揮僉事彭懷遠

都督同知牛允武

海寧衛左所百戶陶炳

海寧衛正千戶滿正

嘉興所正千戶張淮

都督同知萬民望

溫處守備盧子鳴鎧

金叅將丹

朱總兵先

台州指揮僉事陳大成

范文學希雲

兩浙名賢錄卷三十一 目次終

兩浙名賢錄卷之三十一

東海徐象梅仲和氏謨

鹽官查允亮具卿氏閔

武功

宋 共三十九人

殿前都虞候張伯玉瓊

張瓊字伯玉其先自館陶徙衢遂爲衢之常山人世爲牙中軍瓊少有勇力善射隸太祖帳下周顯德中太祖從世宗南征擊十八里灘砦爲戰艦所圍一人甲盾鼓

謀而前衆莫敢當太祖命瓊射之一發而踣淮人遂却
 及攻壽春太祖乘皮船入城濠城上車弩遠發矢大如
 椽瓊亟以身蔽太祖矢中瓊股死而復蘇鏃着髀骨堅
 不可拔瓊索杯酒滿飲破骨出之血流數升神色自若
 太祖壯之及卽位擢典禁軍累遷內外馬步軍都軍頭
 領愛州刺史時太宗自殿前都虞候出尹開封難其代
 者太祖曰殿前衛士如狼虎者不啻萬人非瓊不能統
 制卽命瓊代爲都虞候遷嘉州防禦使瓊性暴無機多
 所凌轢時史珪石漢卿方用事瓊輕侮之日爲巫媼二

人銜之切齒發瓊擅乘官馬納李筠隸僕畜部曲百餘人恣作威福禁軍皆懼時建隆四年秋郊禋制下方欲肅靜京師乃召訊瓊瓊不伏太祖怒令擊之漢卿卽奮鐵撾亂下氣垂絕曳出遂下御史案鞫之瓊知不免行至明德門解所繫帶以遺母獄具賜死太祖旋聞瓊家無餘財止有僕三人甚悔之因責漢卿曰汝言瓊有僕百人今何在漢卿曰瓊所養者一敵百耳太祖遂優恤其家以其子尚幼擢其兄進爲龍捷副指揮使

鎮海軍行營司馬孫承祐

子諤附

孫承祐錢塘人其姊爲錢俶妃因擢處要職累遷浙江東道鹽鐵副使鎮海鎮東兩軍節度副使知靜海軍節度事開寶初隨俶子惟濟入貢詔授光祿大夫檢校太保鎮海鎮東等軍行營司馬俶又私署中吳軍節度七年俶復遣承祐入貢令諭旨於俶將有事於江表及王師渡江命內客省使丁德裕率步騎一千詔俶以所部與德裕會攻常潤承祐從俶克毘陵功居多改中吳軍爲平江軍真授承祐節太平興國中俶來朝盡獻其地徙泰寧軍節度使從幸大名留知府事雍熙二年改知

滑州數月卒贈太子太師中使護葬承祐在浙右且憑藉親寵恣爲奢侈每一飲宴凡殺物命千數常膳亦數十品方下箸從車駕北征以索駝負大斛貯水養魚自隨至幽州南村落間日已曷西京留守石守信與其子駙馬都尉保吉及近臣十數人尚未朝食適遇承祐卽延入所止幕中膾魚具食窮極水陸人皆異之承祐少時嘗夢人以著草一本增其一而授之旣寤以語所親曰大衍之數五十其用四十有九今增其一我壽止於此乎果五十而卒子誘至駕部郎中出爲淮南節度行

軍司馬

兩浙都鈐轄使沈承禮

沈承禮湖州烏程人錢鏐辟置幕府署處州刺史鏐子
元璿以女妻之署爲府中右職出爲台州刺史元璿卒
子佐嗣以承禮掌親兵叙卽位命知威武軍節度事克
兩浙都鈐轄使王師征江南叙遣承禮率水陸數萬人
助克毘陵因攻潤州城中兵夜出焚外柵諸將皆欲馳
救承禮曰兵志有云擊東南而備西北者此之謂也命
士皆擐甲燔食堅壁不動他壘不設備者悉驚擾獨承

禮所部敵人不敢窺丹陽平遂率兵抵建業李煜歸朝
錄其功真授福州節制太平興國初假書獻浙右地徙
承禮鎮密州八年卒年六十七廢朝二日贈太子太師
中使護葬

知龍泉沈濟叔希稷

沈希稷字濟叔溫州人宣和初知龍泉三年睦賊洪載
入寇諸邑皆陷龍泉民情洶洶希稷毅然爲守禦計賊
至與戰大破之事平朝廷嘉其功增秩一等在邑五年
去之日送者攀轅涕泣爲立三賢堂於玉峯寺以祀之

台州鎮將杜安常伯僖

子幼常幼偉孫士賢附

杜伯僖字安常東陽人猿臂善射熟韜畧多智計以功名自期宣和盜起大將楊惟中率師進討伯僖杖策謁於軍門惟中與言大喜留之幕下運籌制勝出奇無窮房與賊對勇氣溢發橫戈而前賊無堅陣賊平授誠忠郎轉台州鎮將歷史館檢閱紹興間妖賊嘯聚東鄉鎮將王公雅問計於伯僖伯僖曰愚民迫飢寒弄兵山谷間非其本心但殲厥渠魁則脅從自解若縱兵窮討必且濫及無辜公雅從之民獲保全後其子幼常幼偉孫

士賢俱登右科。躡顯仕人。以爲陰德之報。

鄧熹

鄧熹遂昌人有勇畧。善文章。宣和中。寇犯松陽。遂昌間熹散家財。結里中拳勇。少年入邑禦侮。賊至與戰。出奇破之。賊衆奔竄。兩邑遂全。郡將黃葆光聞於朝。增秩賜金。以榮其歸。仍官其一子。

趙育才

趙育才與鄧熹同里。政和中。選爲武學博士弟子。膂力絕人。更精於射。去百步而射。楊葉無不中者。時稱猿臂。

武功

卷之三十一

五

光碧堂

方臘叛與熹父子集趨壯相衙角邑人恃以安堵時松陽賊侵掠及境乃率所部格於孟山前賊勢張甚育才手射殺數十賊矢盡擲弓於地橫刀直入賊陣賊衆披靡分兩翼左右合擊育才復砍殺數賊力盡死於礮下聞者莫不太息

薛彥明開

兄開閭從子居實從兄謹言里人鮑若禹也汝諧附

薛開字彥明永嘉人徽言之族子少喜讀孫吳兵法慨然有澄清天下之志宣和末俞寇猖獗開與兄閭閭及閭子居實謀曰郡將預爲守禦計弗許乃與里人鮑若

雨包汝諸議鳩財積穀陰合里中少年族中子弟授以
兵器分地自保時教授劉士英與石礪畫城爲八界率
義民以守之開自與閭守城南之西隅而使居實總其
綱寇至攻永泰門肉薄而登居實發弩開櫛禦從兄謹
言奮擣斃其先登者寇氣懾而退開復簡精勇數十人
夜縋城下斫其營寇驚走自相蹂躪死者不計其數寇
遂奔寨去事平口不言功鄉人高之

黃仁環

唐子容附

黃仁環浦江人生而勇悍有智略喜談兵而議論多依

名節方臘之亂鄉里不逞多從之者仁環以爲耻獨奮勇出身保禦郡守上其功授承信郎建炎初山賊作亂仁環呼諸子謂曰吾受國恩恨無以報誓當以計禽賊乃與友人唐子容謀僞與賊合賊信不疑仁環語其首曰今欲破縣兩主不宜俱行俱行誰守寨者吾初歸無以自效願率子弟爲先鋒陷陣諸酋大喜盡命賊衆聽仁環指揮仁環乃引衆東行十餘里將覆賊乃詭分兩道出攻虛整部伍密令子容等各挿竹於首以爲標識與賊兩兩相夾部分既定仁環奮刀大呼曰轉陣殺賊

賊衆出不意錯愕不知所爲皆束手受刃千餘人脫者無幾諸酋留者仁環令諸子餐於家酒酣用大斧斫殺之初仁環有女嫁賊黨中或曰公報國固善如愛女何仁環曰吾恐事不就一女何足惜至是其女竟爲賊所害仁環官至訓武郎卒鄉人感其德立祠祀之血食至於今不衰

王達

王達縉雲人生有勇力善劍槊能步聞宣和間方臘寇縣勢甚披猖縣尉詹良臣以力戰死人情洶懼達乃率

壯士數百人從間至仙居會呂師囊爲內應取道檄官軍夾攻之遂大破賊鄉邑乃全事定身退口不言功郡守上其事授承信郎不受卒之日男女走哭者數千人相率立祠祀之請於朝封忠烈侯

陳彥聲宗譽

陳宗譽字彥聲東陽人宣和間盜起睦州鄉邑無賴有謀欲應之者宗譽聞之急竄身無賴中察其稍解事者一二人力諭以禍福使轉相告譬應聲解散得不從亂安撫使劉述古聞而賢之知其有可用才因命宗譽糾

合義兵以衛鄉井。宗譽卽椎牛置酒。悉呼向所識無賴諸少年。縱飲之。酒酣。宗譽語諸少年曰。從賊之與從義。相去甚遠。從賊則禍及宗族。且沒身而受惡名。從義則保全里閭。卽及身而受上賞。惟諸君熟計之。諸少年曰。向微陳父言。吾屬爲不義死矣。今之身陳父之所生也。敢不惟命是聽。宗譽大喜。盡醉而去。諸少年歸。各率其黨。操戈荷鍤。手弓橐矢。而前以聽宗譽約束。宗譽卽以兵法部伍之。畫地爲守。賊偵有備。不敢犯。民用安堵。述古欲官之。宗譽不肯曰。吾用諸少年力。而一身受賞。能

無報。顏乎述古聞而更賢之。稱曰義士而不名。建炎初盜起。宗輿復率諸少年扞禦立功。及論賞。又辭。郡錄其前後功。奏補承信郎。又辭。有司臨以朝命。不得已散家財。適勞諸少年。而後受職。未幾轉承節郎。貤貽守監司。薦其才。除沿邊巡檢。不赴。卒於家。

承信郎閻丘民表觀

閻丘觀字民表。遂昌人。側儻有大志。宣和癸丑。睦州寇變。賊曹洪載陷松陽。據其城。分兵以攻遂昌。勢張甚。朝廷下詔招安之。當事者縮首莫敢往。觀慨然請行。遂單

身賁詔入賊營以義撼之成約而反朝廷嘉其功授承
信郎靖康初京城失守本路帥命觀率衝發處三州兵
赴難及至二帝已北轅痛哭旋師遇高宗渡江勤王率
所部歸之高宗大喜特旨轉三官後以軍功歷九任積
官至武翼大夫

殿前將軍童淑

童淑壽昌人面如紫玉赤睛虎鬚有膂力能挽強弓射
百步外無不貫心洞脅者鄉里服其勇宣和中童貫討
方臘淑仗劍歸之請獨當一面以淑知山溪險阨命

率銳卒數百爲前鋒開道。賁以大兵繼之。淑轉戰而前。賊徒奔潰。直抵青溪。方臘據巖險自固。不出。分兵塞隘。以困之。會韓世忠從間道人紆源禽臘以出。賊黨悉平。淑功爲多。擢殿前將軍。領宿衛。建炎初。汪來一來二寇。闔越東南騷動。朝廷命淑率師討平之。授江南東路安撫司撫屬。卒。贈太尉。

承信郎方彥通庚

子文燧。文煥。文郁。文思。文翰附。

方庚字彥通。淳安人。家世業農。庚躬耕隴上。喟然歎曰。世方多事。大丈夫當隨時立功。以名不朽。奈何沾體塗。

足甘以老農終耶。昔周文育以大槩取富貴鄉里至今以爲美談。吾能荷七尺鋤，獨不能運丈二槩乎？遂擲鋤於地，從人學兵法，賣牛買劍，橫磨之曰：「以此自立足矣。」已而平方臘，破元朮，屢立戰功，拜承信郎。子五人，文燧、文博、文郁、文思、文穎，少俱從庾於戊馬間。庾復指授諸進退坐作、攻殺擊刺之法，諸子故俱有膽力，以能戰聞。淳熙間，金人再寇，乃募義兵取勝。文燧以承信郎出身，官統制。文博承信郎，文郁進義校尉，知桃源庫務。

統軍王子武

王子武嘉興人初爲統軍睦寇方臘作亂橫行州邑殺
平民二百餘萬蹀血轉聞官軍莫能挫其鋒來攻秀州
去城南一舍而陣衆號十萬子武自太守曰今日之政
公職守子武職戰請背城借一以報國家請速具軍興
翦此而後朝食乃下令簡精銳五百人長兵在前短兵
相接弓矢分左右翼夾射遂啟門鼓噪而出太守復率
百姓登陴雷鼓發喊以助之星瓦皆震戰士勇氣百倍
莫不一當百賊大駭奔潰追奔數十里斬首五千級築
京觀五以表其功賊遂退據臨安不敢北向以窺江淮

者由子武以孤軍遇之之力也

錢學山

弟翬附

錢學字學山淳安人與弟翬俱讀書尚氣節宣和中方臘之亂州邑多被殘破學與翬團民兵衛鄉井民服其令建炎己酉兀术大舉人寇高宗幸海道虜犯臨安沂浙江而上學與翬同邑人方庚率民兵三千東赴至桐廬縣西牛頭山下視其迫險可以置伏遂偃旗息鼓以俟敵至忽鳴鼓揭旗呼噪競起矢石如雨學橫戈擣其中堅翬與庚張兩翼夾擊之虜衆大敗遽北遁高宗回

武功

蹕嘉其功各授承信郎項之衢寇張花項犯歙逼於嚴
州復率義兵破走之羣盜聞其名稱爲二虎未幾以
紹定初江東部使者列其功詔封爵爲惠顯侯爵
惠濟侯立祠祀之賜廟額曰英烈

鞏州通判詹至

詹至建德人官鞏州通判時金人入寇將至鞏界至聞
報卽入與家人訣出坐堂皇上鳴鼓集吏士揮涕語之
曰昔人云君辱臣死二帝北狩四海痛心義與虜讐天
不共戴非盡覆之不足以雪耻若至城下而後圖之則

重圍受困矣。宜及其馬足未停。士腹未飽。先出奇以覆之。然後快。願諸君計將安出。吏士奔應曰。運籌帷幄。是在明公。某輩但有熱血一腔。爲明公報國耳。至慨然曰。是誠在我。遂下令。選精銳二千人。授以長戈大斧。去城三十里而伏。俟虜過。從後斫刺。以威之。勅尉率民丁數百人。於城南掘窋數十處。以簾條蓋之。上覆以土布。煮豆於窋北。以引其馬。又選精銳三百人。授以強弩。伏城濠中。俟虜馬蹶。從濠中起射。又選精銳二千人。授甲盾矛戟。伏城左右。爲內應。今日聞砲。伏者起。內者出。違令

者斬於是令男子登陴婦人治糗至躬坐敵樓以待明日虜大至去甯數十步馬聞豆香爭馳而前忽墜甯中人馬相枕籍後騎爲伏兵所蹙勢不能止如山摧砲聲一舉濠矢如飛蝗城中伏兵鼓噪而出前後夾擊大破之斬獲過當殘虜駭遁賊邑乃完張浚以爲能辟置幕下浚每有戰伐至之借箸爲多浚薦於公積官至左中奉大夫及卒浚深惜之命子拭銘其墓

任彥遠

李侑董之邵附

任戡字彥遠奉化人少英敏多勇略喜讀書每慕張子

房諸葛武侯之爲人嘗歎曰假令二賢而在吾願爲之
執鞭識者知其不凡與同邑李侑董之邵以慷慨好義
義稱卽四方慕義者莫不推此三人三人亦深相結以
名節相期許建炎三年金人陷明州縱兵大掠諸縣多
被殘毀戢與侑之邵奮義鼓勇共率家丁數百人禦於
泉口每乘間出奇以擣虜虜不敢犯奉化得全當路上
其事有詔俱官修武郎三人者相視而笑各不受

趙樞

趙樞東陽人氣豪而有材畧挽強弓射百步外皆摘掄

心時稱能手。宣和中。睦寇猖獗。權仗劍詣大將楊惟中。請獨當永寧一面。惟中壯之。簡鎗杖手三百人。隸焉。權轉戰而前。賊無敢當其鋒者。連破青石。光明。上清諸洞。皆生禽其酋。致之幕下。乃令卑中少年。協力固守其地。而自部鎗杖手四出。殺賊。賊望風而逃。四境安堵。帥府上其功。詔授廵功郎。尋補東陽尉。追捕盜賊如鷹搏兔。見蹤必獲。盜賊畏之。終其任。無敢竊發者。卒於官。

神勇軍統制呂希祖渭孫

呂渭孫。字希祖。東陽人。紹興間。武舉高第。歷有軍功。累

陞殿前司統領官荆湖宣撫使薛象先聞其忠勇擢爲神勇軍統制使募兵以守樊城簡帳下千人授之渭孫將行坐教場豎紅白二旗語衆卒曰吾此行誓以死報國能借死則可借生一人食生則吾事敗矣願行者立紅旗下不願者立白旗下趨而之紅旗下立者僅四百人渭孫卽以六百人還宜司因下堂勞四百人徧拜之然後出令有一卒入人家誤碎其釜者渭孫立斬之衆大驚所過秋毫無犯更募得四千人率守樊城每出奇禦虜當時稱爲名將後爲副都統魏友諒所疑使其婿

害之三軍爲之雪涕

檢校少師孟璞王珙

孟珙字璞玉歸安人防禦使宗政子勇而有謀金人犯襄陽駐兵關山珙料其必關樊城獻策宗政由羅家渡濟河諸軍臨渡布陣金人果至半渡伏發殲其軍宗政被檄援棗陽臨陣父子相失珙望敵圍中有素袍白馬者珙大呼曰是吾父也橫矛躍馬突圍而入敵衆披靡援宗政以歸由是顯名累功授忠翊郎辟京西第五副將權管神勁左右統制宗政招唐鄧蔡壯士二萬餘人

號忠順軍。命江海總之衆不安。制置司以珙代海。珙分其軍爲三衆。乃帖然。乃白制置司。剏平堰於棗陽。溉田十萬頃。立十莊。三轄使軍民分屯。是年收穀十五萬石。又命忠順軍家自育馬官給芻粟。馬益蕃息。升京西第五正將。棗陽軍總轄。本軍屯駐忠順三軍。紹定六年。大元將那顏倂蓋追金主完顏守緒。逼蔡徽。珙討金。唐鄧行省武仙。仙時與武天錫及邵守移剌瑗相犄角。爲金盡力。欲迎守緒入蜀。犯光化。鋒剴甚。珙逼其壘。一鼓拔之。斬天錫。獲首五千級。復犯呂堰。珙督諸軍追擊之。進

通大河退逼山險。砦軍四合。金人奔輜重走。獲甲士五十有二。斬首三千。馬牛橐駝以萬計。瑗懼。遣其部曲奏書請降。琪單騎入賊。瑗請死。伏階下。琪命易衣冠。以賓禮見。聞者風動。於是順陽令李英以縣降。申州安撫張林以州降。仙愛將劉儀以壯士二百人降。時仙所據九砦。其大砦石穴山。以馬蹬沙窩帖山三砦爲蔽。劉儀曰。三砦不破。石穴未易圖也。若先破離金砦。則王子山砦亦破。帖山沙窩孤立。三砦成禽矣。琪乃遣兵向離金。令諸軍執黑旗入砦。金人不疑爲宋兵。乃分據巷道大呼。

縱火掩殺。幾盡。直擣王子山砦。斬金酋小元帥。梟其頭。
軍聲大振。乘勝攻下馬蹬。火光燭天。殺傷山積。師還至
沙窩西。與金人遇。大破之。是日三戰三克。默候里砦不
攻而自下。板橋石穴守將安威王顯大懼。乃因劉儀乞
降。而顯軍猶未解甲。琪單騎入其砦。周視良久。乃去。如
素所撫循者。饗以牛酒。皆醉飽。歌舞。琪料武仙將上砦。
山絕頂窺視。令樊文彬詰旦奪砦。山駐軍其下。前嘗設
伏。後遮歸路。已而仙果果登山。及半。文彬麾旗伏兵四
起。仙果失措。枕籍崖谷。山爲之精明。日攻石穴九砦。辟

食啟行晨至石穴時積雨未霽文彬患之珙曰此雪夜
擒吳元濟之時也策馬直至石穴分兵進攻自寅至巳
力戰九砦一時俱破武仙遁走降其衆七萬人獲甲兵
無算還兵襄陽轉修武郎鄂州江陵府副都統制元遣
宣撫王楫約共攻蔡制置司謀於珙珙請以二萬人行
因命珙盡護諸收金兵二萬騎繇真陽橫山南來珙鼓
行而前金人戰敗却走追至黃陂斬首千二百級進逼
柴潭立柵蔡人恃潭爲固珙命決其潭實以薪葦遂濟
師攻城城中絕糧老弱互相食諸軍日以人畜骨和芹

泥食之。琪帥師向南門，至金字樓，列雲梯，令諸將聞鼓則進。馬義先登，趙榮繼之。萬衆肉薄，大戰城上，降其丞相烏古論栲栳，殺其元帥兀林達及偏裨二百人。門西啟，招倭蓋入。江海執其叅政張天綱，琪問守緒所在。天綱曰：「城危，卽取寶王置小室，聚以草，號泣自經。」曰：「死使火我，烟焰未絕。」琪與倭蓋分守緒顱骨，以歸。特授武功郎主管侍衛馬軍行司公事，制置司奏留琪襄陽兼鎮北軍都統，制鎮北軍者。琪所招中原精銳百戰之士萬五千餘人，分屯巢北樊城、新野、唐鄧間。俄令赴樞密院。

稟議授帶御器械暫駐黃州朝辭上曰卿名將之子忠
勤體國破蔡滅金功績昭著賜賞甚厚兼知光黃二州
增陴浚隄蒐訪軍實邊民來歸者日以千數爲屋三萬
間居之厚加賑貸兼主管管内安撫司公事節制黃蘄
光信四郡軍馬元兵女八陽諸郡守相率遁去江陵危
急詔沿江淮西遣援衆無踰其者乃先遣張順渡江
琪以全師繼之破砦二十有四還民二萬襄陽圍解封
隋縣男擢高州刺史忠州團練使兼知江陵府京西湖
北安撫使未幾授鄂州諸軍都統制元兵分寇襄陽淮

甸、靳舒二守委郡去。光守遂以州降。合三郡八馬糧械，
攻黃守王鑑。帥萬文戰不利。珙入城，軍民喜曰：「吾父來
矣。」駐帳城樓，指畫戰守，全其城。斬逗留者四十有九人。
以徇。諸將士彌月戰苦，病傷者相屬。珙遣醫者視療，士
皆感泣。授定遠軍承宣使，帶御器械。鄂州江陵府諸軍
都統制。珙以三軍賞典未頒，表辭，不許。未幾，授樞密副
都承旨。京西湖北路安撫制置使兼知岳州。乃檄江陵
節制司擣襄郢。於是張俊復郢州，賀順復荊門。軍冒矢
鏑，復信陽軍。劉全三戰皆捷，復樊城。遂復襄陽。初，詔珙

收復荆襄。珙謂必得郢。然後可以通餽餉。得荆門。然後可以出師。兵由是皆授方畧。發兵深入。所至皆以捷聞。未幾。元將塔海并禿雪帥師入蜀。號八十萬。改珙知夔州。珙提兵疾走。卽增置營砦。分布戰艦。遣張舉帥銳卒從間道抵均州。防遏元兵退走。升夔路制置大使。兼屯田大使。元兵至三川。珙下令。應出戍主兵官。不許失奔。寸土。權開州梁棟乏糧。請還司。珙曰。是棄城也。棟至。斬其首以徇。由是諸將。莫不惟謹。拜檢校少保。進封漢東郡公。兼知江陵府。珙謂其佐曰。政府未之思耳。彼若以

兵縱我上下流急將若之何。珙往則彼構吾虛不往則
誰實扞患識者是之。詔荆湖調兵五千。戍安豐。援壽春。
珙遣劉全將以往。有命分兵三千備齊安。珙言黃州與
壽昌五江口隔一水耳。須兵卽渡何必預達。先一日則
有一日之費。無益有損。萬一上游有警我軍已疲。非計
之得也不從。珙至江陵登城歎曰。江陵所恃三海不知
沮洳有變爲桑田者。敵一鳴鞭卽至。城外蓋自城以東
直至三汊無所限隔。通修復內隄十有一別作十隄於
外。有距城數十里者。沮漳之水舊自城西入江。因障而

東之俾遠城北入於漢而三海遂通爲一隨其高下爲
置蓄洩三百里間渺然巨浸土木之工百七十萬民不
出役元將大綱至江陵遣楊全伏兵荆門以戰珙先期
諜知達於樞密檄兩淮爲備兩淮不知也後果如所報
初珙招鎮北軍駐襄陽李虎王旻軍亂鎮北亦潰乃厚
招之降者不絕行省范川吉密通降款以所受告爲贖
珙白於朝不從珙歎曰三十年收拾中原人今志不克
伸矣病遂革乞休致授檢校少師寧武軍節度使致仕
終於江陵府訃聞帝震悼輟朝三日贈太師封吉國公

謚忠襄珙忠君體國之念可貫金石在軍中與叅佐部
曲論事言人人殊珙徐以片言折衷衆志皆慙名位雖
重惟建旗鼓臨將吏而色凜然無敢涕唾者退則焚香
掃地隱几危坐若蕭然無事其學邃於易六十四卦各
繫四句名警心易亦通佛學自號無庵居士

元 共七人

吐蕃宣慰使陳萍

陳萍婺之蘭谿人宋丞相宜中弟自中之子宋亡育於
外家楊氏元世祖物色宜中子孫得萍大喜奇其骨相

厚遇之。萍刻意於學，兼通梵教。尤精騎射。世祖以爲才，賜名輦，真伽刺思入侍。東官日見親幸。成宗時，吐蕃入寇，邊烽告警，以萍領吐蕃宣慰使，帥兵討而平之。悉定其地，賜上尊襲衣，獎諭甚至。及武宗朝，以萍習知西事，特命撫寧邊陲。初入敵境，有數千騎整衆而來，俸與之遇。亟令從騎解鞍列坐，環以重車如城郭。左右指揮外示閒暇，敵疑有伏，懼莫敢前。敵有以所戴白幘揭於竿首者，萍引弓一發中之。遂驚駭遁走。由是諸部服從，不敢叛入朝。以功拜大司徒，進階銀青榮祿大夫。

知吉州軍事楊國華實

楊實字國華諸暨人明經兼通武略少補邑博士弟子
員累舉進士不第遂弃去築室桐岡博綜羣籍攻苦食
淡不積櫛者十餘年遂盡通天文地理風角占奇門
遁甲之術延祐間以人材徵乃起歷知吉州軍事時遁
寇犯境勢剽甚民心剴懼實簡精壯授甲登陴復厚募
驍勇數百人分爲三隊以左右翼爲兩甄自將中軍奮
勇先登賊衆奔潰追斬不可數計悉平之捷聞特進河
南東路檢法升都奏進院檢試南宮號稱得人遷大理

丞當時稱上馬殺賊下馬能作露布者莫不首推楊國華

東陽翁王靖翁安國

王安國字靖翁東陽人遷之孫也。獨有智略以門功授成忠郎當入官會宋亡不果元始有江南人心危疑未輯往往兵起安國以策干大帥高勳歷陳撫綏之計署東陽尉能布威立信以馭其民士山民畏服等恃險爲亂殺官慰使陳天佑行省左丞史弼將兵來討安國詣軍門上謁曰此鼠輩耳宜慰不戒遂致披猖力能縛

之寧須大舉以費軍興弼因遣之安國親入賊窟手縛其渠魁以獻弼大喜曰使吾兵不血刃而獲賊首者尉之力也延置幕下將薦用之以親老母無何而寧海妖賊楊鎮龍反玉山境接寧海據爲巢穴勢殊猖獗安國率鄉兵扼險要拒之賊出閉輒敗乃從間道趨義烏遇官兵與戰賊衆奔潰安國卷甲追之遂禽其酋安國爲人謹厚重然諾民服從之有訟不直於官而惟尉言是正鄉閭賴以安輯者二十年歿後民有肖其像而祀於家者

武略將軍董彥光

弟舜傳子谷彪廷輔附

董彥光新昌人生平慷慨有志節至正間盜馮輔卿作亂陷新昌彥光斥家財招集義民屯境上明日盜擁衆而西彥光設伏以弱兵引之入隘遂與弟舜傳子谷彪廷輔挺劍直前伏起張兩翼夾擊之禽輔卿梟其首俘賊黨數千人郡將上其功詔授武略將軍僉元帥府事子弟三人俱授武信郎

明

共三十八人

周德問

周德間松陽人少通書史尤精武略值元季寇亂屢率子弟保障鄉邑及王師下括蒼辟德間守禦處州復合兵數萬東取甌城屢立奇功身退不言有大樹將軍之風後上論功頒賞懇辭不受人益高其節乞身家居損貲築白龍堰淮東鄉田數百頃民饒獲至今因更其名曰周公堰

袁千戶典

袁興錢塘人少好騎射不事生業元季兵興爲義兵百戶屢出奇破賊賊聞風解散歲乙未率衆來歸隨征宣

州功多授千戶諸暨之役有劉總管者爲賊所執與橫
刀策馬突入賊陣衆披靡莫敢當斬首數十拔劉以歸
主帥懷之以爲已功與恬不爲怪亦未嘗以語人人咸
服其量軍士嘗乏食典解銀甲易粟活之及王師進攻
雲南之龍海興時從征慨然謂同列曰吾此行不生禽
渠魁不返也至是請前鋒遂力戰以死詔遣使祭之贈
明威將軍指揮僉事

昭信校尉王仕龍威

弟永和附

王威字仕龍義烏人個儻有大志喜談兵而習弓馬元

末寇犯永康乃與其弟永和招集義兵拒於黃龍寨破之戊戌冬王師下婺州威率衆歸附卽命以所部隸帥府從征有功除昭信校尉觀海衛百戶陞武略將軍紹興衛後所副千戶子孫世襲開國以來義烏有世襲自威始

田子貞貞

田子貞名貞以字行永康人至正丁酉寇起縉雲鄉民多奔竄巖穴且飢饉頻仍道殣相望子貞出粟賑之皆羅拜曰我等已在鬼錄賴公生我倘有所役雖蹈水火

無恨子貞因結爲義旅使扞鄉井寇不敢犯燕訪使者
檄授巡檢舜戊戌天兵下浙東而七閩猶未歸職方陳
友定遣使持空名勅授子貞武義縣尹子貞知天命有
歸遂縛使者戮之而焚其書

永康翼左副元帥呂用明文燧

弟玄明侄季文附

呂文燧字用明永康人元至正間括寇爲亂郡縣發兵
討之皆敗遠近騷然文燧與諸弟侄合謀散家貲率衆
以備之設禁令明賞罰諭以大義衆有固志賊陷縣治
四出焚掠文燧使弟玄明侄季文帥四百人迎敵屢戰

皆捷。會官兵至，與之夾攻，賊敗走，復其縣。帥府諭功，將校文燧等官皆辭。後賊復扇亂，民爲亂。文燧詣帥府白之，卽命文燧總制民兵討賊。乃與其弟侄分道出奇，屢戰皆捷。因義上胡元鼎敗死古田，賊乘勝復陷縣治。文燧奮義鼓勇，復率弟侄合兵夾擊，賊大敗走。追至上黃橋，復敗之，斬獲數百人。時行臺遣都鎮撫邁里古思帥師專征，將與會兵方岩。賊掩至松明橋，擊却之。又陣於剝棕嶺，以逆官軍。諸軍四面合擊，賊遂大潰，枕尸三十餘里。諸將分道窮追，於是賊降。地方悉平。諭功，加文燧

等官復皆辭不受。及王師下婺城，文燧籍其衆歸附。授永康翼左副元帥，知縣事。遷中書管勾，轉嘉興府知府。松江民亂，襲嘉興。文燧使告總帥李文忠，遣兵擒獲諸將，欲屠城。文燧力爭止之。入朝，勸往諭奢，遂國行次典化，卒於驛舍。

浦江吳左元帥吳志德

蔣可大附

吳志德，浦江人。元季盜起，偕同里蔣可大協謀，倡衆捍禦。民賴以安。戊戌，行省左丞李文忠帥兵下浦江。志德與可大率衆迎謁，留置麾下。徵取諸暨、處州功。多授志

德浦江翼左元帥可大副之未幾皆以病殚歸志德與兄志道友受甚篤誓不分異傳及五世皆同居子孫繁衍遵其家法至今

吳啟明文秀

吳文秀字啟明浦江人有膂力習騎射兼知韜略元末寇盜縱橫乃集鄉人累石爲砦以扞鄉井及王師取紹興啟明率衆來應以計開錢清濠兵遂大捷勅免其家差役以旌其義後授宜武使卒於家

義兵千戶葉良器

良器景陽孟圭師正附

葉良器青田人慷慨有大節元末擾攘良器團結義勇
保捍井邑總制胡深薦授義兵千戶勦山賊及征方谷
珍克平陽城功最陞萬戶戾攻瑞安深入敵境被獲不
屈死事聞詔存恤其家胡深爲文祭之哭以詩哀感三
軍無不隕涕良器弟良殷子景陽景陽子孟圭孟圭子
師正俱以義勇殺賊有保障功

駕前親軍指揮周得璠

周得璠東陽人自少好勇有大志家世業農得璠每倚
鋤而歎曰終歲胼胝不得一溫飽大丈夫顧甘爲溝中

瘠乎乃賣牛買馬改農器爲長刀躍馬舞刀便有封狼
居胥意喜曰以此取富貴足矣太祖高皇帝兵克葵
城得璫委身歸附每遇敵先登陷陣功多累授正千戶
尋陞駕前親軍指揮僉事上以其勇而有謀命鎮守
北平永樂間胡虜犯邊得璫出奇兵攻破之追至黑松
林獲其輜重斬級過當陞隆慶衛指揮同知子孫世襲
吳伯榮壽孫 子仁附

吳壽孫字伯榮浦江人見義勇爲里中惡少有乘亂殺
人者壽孫忿然曰鼠輩恣肆不軌罪不容誅是而可忍

孰不可忍。幸子弟捕獲送官。置諸法。人心肅然。思亂者戢影以去。一鄉皆稱爲新塘義士。子仁富而好施。以急告者。未嘗不折券相付。遂以財役使里中數百家。戊戌冬。王師下。婪寇多竊發。仁簡其素所役使者得拳勇五百餘人。授甲置砦。畫地以守。縣境賴其保障。朝廷嘉其功。授以官。辭疾不拜。晚築室新塘之椒山。宋太史漁題其顏曰施惠庵。里人因稱爲惠翁。

陽朔縣知縣蔣公直

蔣公直。象山人。智勇絕倫。處鄉里。恂恂執禮讓。孝友篤。

至人無間言。洪武初，蘭秀山賊據縣治，四出剽掠，衆莫能禦。公直謀於縣令孔立躬，先率衆伏寶梵寺，出奇攻賊，大破之，禽其渠魁，梟首以徇。招徠脅從者數百人，邑賴以安。事聞，賁白金五十兩，擢桂林府陽朔縣知縣。時居民不識蠶桑，公直令之植桑，仍市蠶種於他郡，教以飼蠶之法。民遂衣被至今，卒於官。

燕山左護衛指揮僉事陳良輔翼

父典附

陳翼字良輔，長興人。父典字朝傑，生元季，才識不羣，有聲里社。楊左丞辟除萬戶，時天下已亂，落落無所遇，仗

武勇

卷之三十一

五

乾德

策歸附我。高皇帝從征伐，備宿衛，累功。陞驍騎前衛百戶，從征雲南蠻洞，力戰死。翼襲職行間，特授濟陽衛世襲千戶。戊辰，征魚兒海子。庚午，征以都山。辛未，征鴉寒山。乙未，出擊遼東野人，累功，特授燕山左護衛世襲指揮僉事。庚寅，太宗皇帝舉靖難之師，翼已籍近屬，自安定門始事，及渡江，率甲四千，環數千里，大小二十四戰，略定二十餘州，國必取，攻必破，援必濟，師交必全勝。未嘗少挫。己卯，以白溝河濟南功，陞指揮同知。庚辰，以東平汶上功，陞都指揮僉事。是年六月，平定京師，陞

鎮國將軍陝西都司都指揮同知尋命掌金吾右衛事
永樂己丑扈駕還北京進階榮祿大夫中軍都督府都
督同知後二年數將神機營軍馬扈巡迤北至和林逾
土刺河擊斬胡寇瓦刺人畜殆盡後七年上素知翼
老成可屬大寄詔往南京督府視事洪熙改元仁宗
皇帝念翼勲舊召還任北京未幾有疾詔給醫藥調治
久之不能起宣德三年卒壽六十有二訃聞輟朝一日
給喪具道里費勅有司卽長典祖塋治葬從一品制翼
年少神觀高偉聲如洪鍾讀書善騎射以才氣自負及

爲將矜而不肆嚴而有恩又能先機倡勇制變履危耀
兵整旅之間敵常不戰而自却非獨長驅銳進能用其
死力而已戰勝之日務以弔殘恤寡爲事未嘗妄殺一
人故士卒樂附所向成功爲一時名將云

都指揮同知蔣貴

蔣貴諸暨人長軀偉幹多膂力善騎射未嘗讀兵書而
行軍多與暗合發跡行間以從征胡寇有功累陞都指
揮同知西虜阿台朵兒只伯數侵盜甘涼諸邊戍殺掠
吏人羽書旁午以貴與任禮爲左右副總兵率師往伐

而一受兵部尚書王驥節制得一切便宜當是時都指揮使安敬爲偏將驥而怯貴與都御史竇翼追虜至魚海子將及之而敬謂前途無水草不可進引還竇翼言狀上密勅驥責貴死狀而倖敬軍中以徇於是諸將士皆股栗莫敢仰視驥乃請分兵盡地自莊浪西南抵黃河東北抵寧夏屬都督李安自涼州北抵鎮番南抵古浪東北抵板井屬都督趙安自甘州東過山丹抵永昌北抵騰脂堡西抵深溝壘屬任禮自肅州東接深溝稍東北抵鎮夷西抵嘉谷北抵天倉屬貴約以賊小至

則各自爲戰。守大至則并力拒敵。軍勢遂大振。尋下詔。以禮爲平羌將軍。貴與趙安副之。而驥特爲監督。討阿
古朵兒只伯。諸進取悉聽驥。驥謀虜營狼山等處。乃選
精騎授貴。使爲前鋒。而自將任禮等。以大軍繼之。且與
貴約曰。勉旃。不能成功毋相見也。貴感奮。直前搏虜。敗
之。虜渡黃河遁去。貴又追敗之於石城。虜食盡竄兀魯
乃地。北依阿台。貴復以精騎二千五百出鎮夷間道。兼
行。三日夜及而大敗之。得其左丞脫羅及裨校百人。斬
首三百餘。獲金銀璽甲各一。駝馬兵甲以千計。朵兒只

伯與阿台以數騎遁，尋賜死。而任禮兵亦窮追五百里，餘降其平章阿的平并部落數十帳而還。捷聞，貴禮皆進封伯爵，而驥兼大理寺卿，還部理事久之。麓川宣慰司思任發叛，雲南總兵沐晟與弟昂討之，數不利。晟至以憂死。上特拜定西伯貴爲平蠻將軍，驥仍總督軍務。率副將軍李安、劉聚等大發兩都諸鎮漢土兵合十五萬討之。瀕行，賜驥貴黃金幾半細鎗，蟒繡緋衣，朱弓矢。驥乃馳傳至雲南，而貴等兵集。驥乃奏上方略，請遣叅將冉保等由東路直取孟定，會木邦車里夷兵而貴。

率大軍由中路至騰衝與保會俾賊腹背受敵從之冬
十月貴等抵金齒其別酋陶孟刀門捧以鎮康降因其
衆破昔刺寨進攻孟通遂圍上江因風焚其排柵大破
之斬敵五萬餘級上江平遂由夾象石渡下江通高黎
貢山道移駐騰衝進抵木籠山而思任發令陶孟輩者
軍心等以二萬餘衆乘高據險爲七營相救貴遣劉聚
宮聚分左右翼緣嶺攻之不下貴乃自率中軍以進夾
擊之遂破殺衆者軍心等乘勝至馬安山麓川大震尋
敗其衆陣於泥濘箐復敗其衆於
泥濘箐斬首

虜二千餘級、遂進圍施川、縱火焚其門、并庫藏廬舍皆盡、俘斬及溺死者數萬人、思任發夜携其二子走孟養、以大捷聞、詔令班師、遣戶部侍郎王質、齎羊酒迎勞數百里外、既入見、慰勞有加、封驥靖遠伯、子孫世襲、賜諡、券貂蟬冠、朝服玉帶、白金百兩、綵幣十表裏、鈔萬貫而貴進、封定西侯、賞亦如之、當是時、思任發尚在竄也、其子思機發復率其餘衆往來窺伺、乃復命驥總督雲南軍務、率諸將士往圖之、驥至、思任發復走緬甸、索之不獲、而思機發衆漸盛、不能制、乃奏請益兵、詔復遣定西

侯貴以兵五萬會討。然緬甸卒不肯送。恩任發以恩機發致讐爲解。驥等無如之何。貴乃縱兵擣恩機。發寨獲其妻子家屬。及從賊百餘。戰象十一。詔還京師。加祿定西侯貴歲五百石。驥三百石。其白金鈔幣如初。未幾疾作。薨於位。貴果勇善戰。自卒伍至爲大將。身經五十餘戰。未嘗敗北。每遇大敵。無不先登陷陣。驥前後皆賴之以成大功。而身退不言。無纖毫矜伐之色。驥以故嚴重之。訃聞進封經國公。謚武勇。

仁和衛千戶王時泰業

王業字時泰其先高郵之興化人曾祖祥元季從軍浙西國朝兵下臨安率先歸附授仁和衛副千戶再調吉安祖斌父成世其職當時稱為將家業體貌豐偉多才幹年十六父喪明襲職京師適軍駕北征例當扈從業在軍中勤循紀律而勇略過人同事者皆驚異之曰南人少年能是乎既凱還復任吉安時年雖少而言動若老成人遇當爲事慷慨無所顧避雖專督屯事而一軍之政務咸咨焉境有急必以屬業梅花峒寇作會議曰彼恃險爲亂攻急則退不與戰緩則肆非王侯莫之武力

能平衆推業往未踰月果平之永豐大盤山賊首曾子良聚衆劫殺勢甚盛將及於縣縣遣人告急郡守陳本深謀於業業知守意欲以屬已乃奮然曰兵固不敢擅調然民患之急如此可坐視乎古有先發後聞者我其行矣即日選精兵二百餘人倍道以行或諷其急業曰彼賊烏合之衆耳計無所出若少緩則有備兵法各有所用也業果卒至過其營壘賊惶懼出戰一鼓而勝之捷聞陞本所正千戶無何而閩浙寇起遣大將寧陽侯倅討之吉安軍當調業統以往從都督劉某殺丁公崖

賊業常爲軍鋒、大軍潰而業之軍獨全、浩然歎曰、吾不得用其智而徒制於人、上不能爲朝廷殺賊、下不能爲生民除害、何以名爲人臣哉、故以是不得論功陞賞、以鬱憤卒、年四十有九、業爲人輕財好義、遇賢士大夫、傾竭無所惜、其撫馭士卒、嚴而有恩、臨陣勇氣勃發、目光如電、橫戈而往、前無堅敵、有古名將風、惜生非其時、不得究其才用云。

懷遠將軍崔惟正端

崔端字惟正、海寧衛指揮僉事、少有大志、偉軀幹、多膂力、

力騎射精捷。器識不羣。生平無狗馬之好。喜觀古圖書。禮接賢士大夫。相與講究。九邊阨塞。及天下險要。南倭北虜。策其情事。如指諸掌。居常輕裘緩帶。投壺雅歌。及臨戎應事。議論英發。無顧忌。聞者奪氣。卽其歸。內寬外嚴。士亦以此附之。景泰間。倭入貢。還所過求索。至樓敵手。乃人經所藩。檄端防護。端耀兵戢旅。臨之以威重。倭酋帖服。威能動遠。自是而東南十餘年。絕無倭警。無何而處婺山民相扇。弗靖。詔遣都督徐恭。總內外兵數千。往剿之。恭聞端有文武才。檄爲前鋒。端率勁兵擒其巢。

生禽賊首，陶得禮上功幕府，進指揮同知，署簡候把總，分守浙東。端感激自奮，竭精神思慮，水陸之行無一日休用，能備舉廢墜。士馬精強，而勞頓困憊，疽發於背，疾革大呼曰：「大丈夫不以馬革裹屍，竟死於床。」第聞乎言畢而逝。時劄室子雲生，僅六月而端就木，年僅四十三。

山西道監察御史項思誠懷

魯孫守禮附

項懷字思誠，奉化人。登景泰辛未進士第，授湖廣道監察御史。丁憂服闋，改授山西道，奉勅征討四川筠連等縣蠻夷，銜命以往。每懷靡及，至則親冒矢石，率先戎行。

險阻嵐瘴一無所避出奇奮斬蠻夷悉平因積勞致瘁
力疾回朝復命卒於邸舍以死勤事而邸典不行識者
惜之曾孫守禮舉進士官至山西按察司副使以風烈
稱

劉原熊

劉原熊松陽人世居蛤湖父惟賢徙居澄川原熊生而
雄毅有奇節正統間陶得義等倡亂松之男女多避難
於橫山寨寨去澄川甚邇守寨者謀諸少年曰吾聞興
師聚衆而無主則兵無節制而易敗非萬全策也此間

有劉原熊者義士也智勇足備可以爲吾輩主盍往求
之諸少年曰諾各捐簪珥詣原熊門諸少年膝行而前
曰吾儕小人創於賊不得不蟻聚以求生顧智不足以
相謀勇不足以相勦人多而耳目不齊心志不一迫生
亂以速斃耳竊聞長者高義願以諸人之父母妻子爲
託不腆簪珥願爲長者千萬歲壽原熊正色却之曰賊
因財而致亂子復因亂而受財相去幾何諸君果真心
推讓者乎請以七尺爲報諸少年大喜原熊因椎牛置
酒悉召諸少年酣飲之立壇於社原熊登壇而盟之乃

下令曰聞鼓則進聞金則退臨陣回顧者斬諸少年無不凜然於是嚴陣以待已而賊至原熊執戈先登諸少年皆呼噪挺戈而前無不一當百賊懼退居城北會夜有携妻子東逃者賊獲之遂盡知寨中虛實次日大風賊乃乘風縱火劫寨原熊率衆力戰於野斬賊酋四級餘賊數百人賊大敗遁走而原熊亦以陣亡諸少年哭之甚哀仍捐簪珥刻木肖原熊像祠之於社曰公以此始亦以此終血牲醴酒各率其父母妻子哭拜於祠下而後去

王剛甫

王剛甫，象山人。偶儻負氣節，讀書略通大義。攝東門巡檢時，蘭秀山賊反，襲縣虜令丞入海。剛甫與友蔣公直謀曰：「狂妄虜我令丞，據我縣治，罪宜誅死。」事聞於朝，大兵必來。邑民盡受害矣，盍先格殺之，乃募衆掩擊，殺其渠魁，釋其脅從者若干人。初，天兵聞亂，將屠邑。京軍二萬已發錢塘，而賊先授首，遂不果渡江。而回邑人聞之，泣曰：「微王君者，吾邑數萬人俱登鬼錄矣。」議者謂是舉力出公直謀，資剛甫。

指揮僉事彭懷遠程

彭程字懷遠海寧衛指揮僉事素負膽略知天文正統十三年沙縣賊鄧茂七據延平稱剽平王都督劉聚檄程率兵往討禡祭邑生司禮者瘞毛血益忽墮地碎程拔劍欲斬之生蹙而言曰此吉兆也賊宛然破矣程喜遂鼓行而前號令甫下旗幟赫然一新明年正月哨延平下營適某帥招飲程移營不赴帥不悅其夜賊劫程舊營不值驚遁走明日程入謁帥知之始大敬服且問故程曰下營時有怪風占必有偷營者故移營以避之

一軍皆稱爲神明當是時關帥屯兵大山程兵寡傍溪結營賊酋朱必森率兵隔溪過呼其屬指而語之曰吾此去先滅大營回軍盡殺此奴輩當以觴饌爲酒器與諸君痛飲耳我軍聞之色動程亦以衆寡難敵遂下馬徧拜衆軍曰使賊果得志回我屬無噍類矣諸君須奮勇當於死中求活顧甘作賊機上肉乎諸軍齊聲以應曰諾無何而賊果乘勝回下溪水挑戰程令諸軍跣足迎之半渡賊鞋襪沒水中拔足不能出擊之大敗追奔數十里初程率兵赴鉛山圍木柵作城以拒賊賊數挑

戰軍士郭阿保善舞牌劉蠻驢善使鐵叉二人相議曰
我與若素號驍勇今不與戰是怯也郭先跳出木城有
騎賊從焉斧之郭以牌迎斧乘勢伏地以進劉舞叉前
支其斧郭忽滾牌起斬其馬足賊墮劉刺之斃乘勢進
攻賊大敗程軍牌皆黑緣賊望見黑牌軍輒驚曰彭家
軍來矣急遁去遂進攻前後洋兩寨及鴛峯山大竹口
嚴家島黃金井連戰皆捷累斬首四百級禽首賊三招
撫脅從者凡一千二百三十餘名九月凱還景泰元年
賊葉宗留復叛率兵往溫州征之多五月守永康七月

游義沙灘渡大戰最十一月次麗水樓山十二月哨日
毋沿滄攻麻陽龍潭破二年五月天井背大戰追至紫
草庵周秦寨累斬首六十一級禽首賊五三年四月兵
部歷敘程戰功以請爲管路所抑僅陞指揮同知功大
而賞薄論者至今惜之

都督同知牛允武桓

牛桓字允武麗水人由處州衛指揮歷陞後軍都督府
都督同知桓沉重嚴毅清慎忠勤折節賢士有敦詩悅
禮之風兩鎮貴州夷人仰之如父母分守左江士民號

泣擁馬首。遞送出境者數千人。所至令行禁止。或夷寇
竊發。旌旄所指。無不立折兇首。每臨陣。親執桴鼓。立門
旗下。意氣凜然。犯令者立斬之。然未嘗妄殺一人。得賞
賜。悉散諸將吏。不以一錢私。慕府以故。士卒樂用。所向
克敵。如落蒙。寵遇方隆。急流勇退。雖致位樞府。而傲服
如寒士。士論益賢之。

海寧衛左所百戶陶炳

陶炳嘉興人。海寧衛左所百戶侯也。喜談兵。工騎射。正
德初。蘭鐙間一劍。光芒射斗。炳隨以將材舉。從討開流。

累征蔡六二王浩入陳邦四俘獲過當陞本衛正千戶
乃顏其堂曰瑞劍

海寧衛正千戶浦正

浦正海寧衛左所正千戶果毅沉雄曉暢兵法每以生
當平世不得一見其奇爲恨正德間部軍器上大司馬
忽與寇遇寇橫陣而來正手射其前鋒四人應絃而倒
寇大駭散去行至滄州首寇劉六劉七率衆萬餘人臨
境守臣欲委城遁正厲聲曰朝廷築城以衛民設官以
守土君去城誰與守將委數萬生靈於賊手乎適仁和

胡世寧以公事道出滄州聞寇且至乃引車入城正聞之大喜曰胡公至無慮賊矣乃自守共請世寧請授方略世寧令守簡其精銳授甲登埤以正節制之正與寇相持凡八晝夜寇中矢石死者千餘人力竭解圍而走滄州乃完尚書張縉疏正功不報當是時正之名聞於西北未幾從征開常深入敵陣後軍不繼遂被害詔贈明威將軍子潮陞指揮僉事

嘉興所正千戶張淮

張淮太僕敘之子。儻有大略。正德間蜀寇猖獗。太僕

兵備利綿有廖麻之難淮開變馳入賊壘願與父同死
侃侃陳利害嚼齧而語目皆出血與淚俱下賊壯而出
之後數從太僕軍中戰通江門鎮有斬獲功別從延綏
參將張鳳征倒塔兒等處斬首虜四級時閣臣楊一清
行邊甚器重之以將材薦授嘉興所正千戶稍歷蕪州
衛指揮同知

都督同知萬民望表

萬表字民望寧波人生有異相玉色方頤額有三文風
神炯炯慷慨多大節讀書一目數行下年十七襲指揮

食事志在鵠起不事家人業晝習騎射夜燃燭讀書揭
孔明寧靜澹泊四言座右曰丈夫經營天下如武侯然
何能類首作求田問舍計予以武舉第一授都指揮督
全浙糧運晉視浙江閩篆南都坐營錦衣已爲漕運恭
將拜總兵掛印累遷南京中軍都督府都督僉書皆以
宿望爲當軸所推教表歷漕既久國計盈誦河渠通塞
祖制及時弊當復當釐靡不明習大者疏小者議累累
千百萬言且極陳本折通融爲國長利而又欲開河北
山東圻內一帶荒田重農薄賦爲漸減歲漕之地尤根

本至論議者。避之。歲甲寅。海上倭亂起。表散家財募死士。奮欲往。擊會以都督僉書南京中府。道經姑蘇。與倭遇婁門。楊涇橋表率所募士。躬冒矢石。挫賊鋒。身中流矢。不爲止。時賊據七閩八閩爲巢。我軍數戰不利。表謂巡撫周琬曰。賊據內地久。近賊處民不得力。田逋負日多。催科敦迫相率去。而爲賊是驅之。以助其勢也。宜亟請捐積逋。懸賞格。使就中作計。以携其黨。兼下募兵令。土著之餉等客兵。則人人樂歸。如得士千。卽賊滅千人也。以較用他兵孰利。議行。歸者寢衆。賊寢衰。乃進兵賊

懼宵遁。殲之海上。焚餘皇若干。內地稍踈。賊方蜂屯諸
島。而歛人王直者。以驍雄魁其首。表策其踈。而可誘而
縛也。薦鄞人蔣洲。張惟遠。使爲間。兩人雅善直。其家坐
通番逮。約獲直以贖。且以上賞許之。日強聒當路前。未
及行而表卒。後總制胡宗憲卒。遣洲渠魁立致東南。晏
然一時。謂爲奇功。不知皆表本謀也。表策夷情洞如指
掌。而論北虜。尤人所未發。嘗曰。古夷狄侵中國。未有中
國人。不爲之用。而能突人者。夫華夷異類。居處寢食。絕
不相同。豈甘心弃衣冠爲大羊袴哉。不得已也。自屯田。

鹽法廢而邊儲日不克、邊儲不克而士卒殍死者衆、殍死者衆而士心日益離矣、士心日離叛亡日衆、凡叛亡之卒、虜皆厚遇之、與婦生子、給以牛馬、享息土、俗漸宜心、無變反而後用爲嚮導、故地里之迂近、兵力之強弱、貨財盈虛、人心離固、將帥勇懦、事勢難易、皆得預知之、而諸邊飢餓、飭瘁之卒、間先叛亡者、幸少須臾無死也、輒相繼以亡而不亡者、亦無固志、是則深可憂耳、夫虜之來也不測、而我之禦也無時、諸邊日夕營營、以目前爲事、何暇爲根本計乎、此所謂決陂以取魚、圖一朝之

利者也。先是庚戌虜闖入塞內，傳大都表聞之。日夜東張爲行計，曰：「吾世受國恩，今憂及君父，豈臣子安卧時耶？」尋事定乃已。表少嗜玄學，已而閱內典，獨契於心，泰寃不輟。一日披衲入伏牛山，晚行見日升，忽大悟，爲文敏給疎暢，直寫胸臆，歷官四十年，家無餘財，鉅鉢蕭然。與野衲偕遊，見者不知其爲名將也。一夕無疾端坐而逝，星隕於庭，光射數十丈云。

溫處守備盧子鳴鏜

盧鏜字子鳴，麗水人家。世武弁，好樂儒術，敬禮士夫。星

傍山池幽雅如圖脫堦登卽展角巾與士大夫觴咏其中守備溫處屢禽劇賊許二等及倭夷入寇十餘年烽火不息定謀僂力俘其渠魁徐海王直等地方以寧歷官浙直總兵沿海居民祠祀之

金恭將丹

金丹嘉善人卜居秀水少爲諸生喜談韓淮陰張睢陽事尋生註誤當立功遂弃而學武龍韜虎鈴無所不窺尤精著數能算計見效會島夷內訌賈勇先登制府檄爲間諜嘗從戚大將軍行間多所俘斬累功歷官恭將

解構家居穆然儒雅不識者不知其爲人將云

朱總兵先

朱先秀水人讀書不成去學劍臂力膽略千人辟易慨然有封狼居意嘉靖間倭躡東南胡少保宗憲懸賞格購倭首先所手斬數十級盡以獻之幕府及頒賞不受曰大丈夫志在立功何以賞爲宗憲奇而用之歷驅場凡四十年累官總兵絕聲伎之好亦不置田宅園囿輕裘緩帶有古儒將風

台州衛指揮僉事陳大成

陳大成義烏人家於倍磊以雄武稱嘉靖三十七年八
寶山礦徒嘯聚萬餘人四出焚劫閩境震恐大成糾率
義旅力剿除之遂以武生應募統率子弟兵五千赴台
州防守四十年四月倭寇屢犯台州花街白水洋等處
叅將戚繼光調遣大成督領王如龍陳子璘等奮勇衝
鋒俘斬倭首一百四十餘顆拔回被掠男婦三千餘人
既而調往江西援剿流賊戰於弋陽上方復部斬首級
一百六十四顆四十一年倭賊入犯大卡又敗之於烏
根嶺屢獲全勝功視諸將爲多先是福建興化被陷倭

管甯於城中者月餘分倭攻掠秀縣全閩告急至是大
成統衆隨戚參將轉聞而前直抵福興克復城濠倭寇
悉平前後凡告捷者十有二欽賞金銀牌面者三加陞
祿秩者一歷授台州衛指揮僉事尋轉浙江管理中軍
都司時倭寇雖殄而士卒多虛糜口糧民不勝供億之
困大成乃建議領兵屯操每年汛期酌給常廩出守解
汛則減糧回縣逢五赴操遇警聽調兵既得以附家地
方又可保守當事者如議星減歲省金錢數萬民困爲
之稍甦云

范文學希雲

范希雲秀水人以明經補郡博士弟子員少負奇氣喜讀兵書嘗語人曰吾以七寸管與黃口小兒爭長於風簷寸晷之間何如獲三尺劍策馬於萬軍中取上將頭乎會倭寇寇郡所簡簡兵授甲使材武士將之希雲請獨當一面遂授先鋒率所部禦倭於平湖出奇設伏大破之追至白馬堰接戰三晝夜所殺過當以援兵不繼陷陣死年二十有六